

**U ovom broju, između ostalog, čitajte:**

- **UPFBiH zastupnicima Zastupničkog doma Parlamenta FBiH: Usvojite izmjene zakona i omogućite povećanje plaće zaposlenima u realnom sektoru do 400 KM**
- **U Sarajevu, Vitezu i Mostaru održani sastanci fokus grupa UPFBiH za usaglašavanje principa Zakona o porezu na dohodak i Zakona o doprinosima**
- **Održan sastanak predstavnika Udruženja poslodavaca u FBiH i Udruženja poslodavaca Gračanica**
- **Kompanije i radna mjesta u drvenoj industriji se moraju prilagođavati digitalizaciji i automatizaciji proizvodnje**
- **Rukovodstvo UPFBiH i UPKS održali sastanak sa ministrom privrede KS**
- **Ukinut PDV na doniranu hranu u BiH**





## **UPFBiH: Hoćemo li izgubiti još jednu godinu, jer vlast u FBiH ne želi omogućiti povećanje plata zaposlenih u realnom sektoru do 400 KM**

### **UPFBiH uputilo urgenciju rukovodstvu ZD PFBiH da se na dnevni red sjednice uvrste Zakon o izmjenama i dopunama Zakona o doprinosima FBiH i Zakon o dopuni Zakona o porezu na dohodak FBiH**

Udruženje poslodavaca u Federaciji Bosne i Hercegovine uputilo je urgenciju rukovodstvu Zastupničkog doma Parlamenta FBiH da se na dnevni red sjednice Zastupničkog doma zakazane za 21.6.2023. godine uvrste Zakon o izmjenama i dopunama Zakona o doprinosima FBiH i Zakon o dopuni Zakona o porezu na dohodak FBiH.



Udruženje poslodavaca u FBiH izrazilo je razočarenje što na dnevni red sjednice nisu uvršteni materijali koje je UPFBiH ranije, direktno ili indirektno predlagalo i dostavljalo, a posebnu zabrinutost izražavaju zbog nepostojanja interesa od strane rukovodstva i zastupnika Zastupničkog doma Parlamenta FBiH za usvajanje ova dva prijedloga izmjena i dopuna zakona, čije bi usvajanje omogućilo poboljšanje standarda zaposlenih.

"Kao što je poznato, UPFBiH je još krajem prošle godine dostavilo više prijedloga koji se odnose na potrebu hitnog poboljšanja položaja radnika u FBiH kroz usvajanje propisa kojima bi se omogućilo da privremeno, do donošenja trajnih sistemskih rješenja, Parlament FBiH

usvoje prijedlog rješenja kojima bi se omogućilo da poslodavci isplate plate radnicima uvećane do 400 KM, a da se država odrekne dijela uplata za poreze i doprinose za taj uvećani iznos plate", podsjećaju iz UPFBiH.



Uprkos obećanjima političkih stanaka koje čine većinu u Zastupničkom domu Parlamenta Federacije BiH da će izmjene i dopune zakona biti brzo razmatrane i dobiti njihovu podršku to se do danas nije desilo. Sa približavanjem godišnjih odmora, dodatno zabrinjava sve izvjesniji scenarij da se čak ni ova privremena rješenja neće naći na dnevnom redu Zastupničkog doma Parlamenta FBiH u skoro vrijeme, tako da postoji opasnost da i ova godina bude "izgubljena" kada su u pitanju rješenja koja bi dovela do povećanja plaća zaposlenih, boljeg životnog standarda građana i barem djelomičnog zaustavljanja odlaska radnika iz BiH.

"Upravo zbog toga još jednom podsjećamo zastupnike na važnost ovog pitanja i molimo, predložimo da se izmjene i dopune zakona uvrste na dnevni red do početka sjednice u skladu sa važećim procedurama", navode iz UPFBiH.

Iz UPFBiH podsjećaju da im nikada nije odgovoreno na inicijativu i zahtjev za održavanje hitne tematske sjednice, na kojoj bi bili razmatrani problemi sa kojima se suočava privreda FBiH, među kojima je nedostatak kvalificirane radne snage i odlazak radne snage, jedno od gorućih.

Iako je to davno obećano, ni izvršna ni zakonodavna vlast u FBiH još nisu oformile čak ni radnu grupu za pripremu fiskalnih zakona, što direktno ukazuje da u FBiH nećemo tako skoro imati prijedlog trajnih, sistemskih rješenja, a posebno je zabrinjavajuće saznanje da čak i kada jednom stupe na snagu Zakon o doprinosima i Zakon o porezu na dohodak prema izjavama nadležnih bit će potrebno više od devet mjeseci da se isti počnu operativno primjenjivati.

Zbog svega navedenog, iz UPFBiH traže da rukovodstvo i zastupnici Zastupničkog doma Parlamenta FBiH uvrste izmjene i dopune navedenih ad hoc zakona na dnevni red sjednice zakazane za 21.06.2023. godine, tim prije što su ova rješenja dobila jednoglasnu podršku Ekonomsko-socijalnog vijeća za teritoriju Federacije BiH.

## Fokus grupi UPFBiH predstavljeni draftovi principa na osnovu kojih bi se trebali pripremati fiskalni zakoni



Odlukom Upravnog odbora, Pravni i Ekonomski savjet UPFBiH je pripremio draft principa na osnovu kojih bi se trebali pripremati Zakon o porezu na dohodak i Zakon o doprinosima.

S tim u vezi, u Sarajevu je 06. juna 2023. godine održan prvi u nizu sastanaka fokus grupe na kojem je učestvovalo veliki broj članica UPFBiH iz Kantona Sarajevo i Bosansko-podrinjskog kantona, a na kojem su poslodavci ažurirati svoje prijedloge, sugestije, komentare i primjedbe na principe koje je pripremila Udruženje poslodavaca u FBiH.

Poslodavci su zaključili da su u pitanju veoma važni zakoni za poslovnu ali i za širu društvenu zajednicu te je vođena kvalitetna rasprava na kojoj su poslodavci iznijeli značajne stručne stavove i prijedloge s ciljem pripreme kvalitetnih konačnih tekstova principa.

Udruženje poslodavaca u FBiH će u narednom periodu održati fokus grupe i u drugim gradovima Federacije, a planirano je da se sljedeće održe u Vitezu i Mostaru za članice iz Zeničko–dobojskog, Srednjobosanskog, Hercegovačko-neretvanskog, Zapadnohercegovačkog te Kantona 10.

Nakon održanih fokus grupa, Udruženje poslodavaca u FBiH će objedinjene prijedloge i

komentare članica predstaviti na završnoj konferenciji, a potom i Upravnom odboru. Finalni dokument koji usvoji Upravni odbor, Udruženje poslodavaca u FBiH dostaviti nadležnim institucijama.

Sastanak fokus grupe je organizovan u sklopu projekta "Doprinos organizacija civilnog društva poboljšanju uticaja preduzetništva na socio-ekonomski razvoj BiH – EISE projekat" koji provodi UPFBiH i Unija poslodavaca RS, a koji finansira Europska unija.

## U Vitezu održan sastanak fokus grupe UPFBiH za usaglašavanje principa Zakona o porezu na dohodak i Zakona o doprinosima



U Vitezu je 08. juna održan sastanak fokus grupe članica UPFBiH iz Zeničko – dobojskog i Srednjobosanskog kantona za usaglašavanje principa Zakona o porezu na dohodak i Zakona o doprinosima. Sastanak fokus grupe je organizovan u sklopu projekta "Doprinos organizacija civilnog društva poboljšanju uticaja preduzetništva na socio-ekonomski razvoj BiH –

EISE projekat" koji provodi UPFBiH i Unija poslodavaca RS, a koji finansira Europska unija.

Pravni i Ekonomski savjet UPFBiH pripremio je draftove principa na osnovu kojih bi se trebali pripremati Zakon o porezu na dohodak i Zakon o doprinosima, a koji su prezentovani članovima fokus grupe.

U konstruktivnoj diskusiji članovi su iznijeli svoje prijedloge, sugestije, komentare i primjedbe na principe koje je pripremila Udruženje poslodavaca u FBiH.

Prethodna fokus grupa održana je u Sarajevu, a iduće sedmice održat će se i u Mostaru za članice UPFBiH iz Kantona 10, Hercegovačko-neretvanskog i Zapadnohercegovačkog kantona, nakon čega će UPFBiH pripremiti objedinjene tekstove principa i iste predstaviti Upravnom odboru, a potom i dostaviti nadležnim institucijama.



## Fokus grupa UPFBiH za usaglašavanje principa Zakona o porezu na dohodak i Zakona o doprinosima održana u Mostaru



U okviru tekućih aktivnosti Udruženja poslodavaca u Federaciji Bosne i Hercegovine na izmjenama i dopunama fiskalnih propisa, odnosno Zakona o doprinosima, Zakona o porezu na dohodak i Zakona o porezu na dobit 12. juna 2023. godine u Mostaru je održan konsultativni sastanak kojem je prisustvovao veći broj predstavnika privrednih subjekata iz Kantona 10, Zapadnohercegovačkog i Hercegovačko-neretvanskog kantona kao i predstavnika Asocijacije poduzetnika Hercegovine.

Prošlo je više od sedam godina od pripreme Zakona o doprinosima i Zakona o porezu na dohodak, ali nažalost, nije došlo do izmjene ovih propisa. To je rezultiralo činjenicom da Federacija BiH danas ima najveće opterećenje cijene rada u Europi, a pri tome zbog slabog standarda, malih plaća i generalno lošeg položaja radnika, sve veći broj radnika napušta Bosnu i Hercegovinu.

U tom smislu, Udruženje poslodavaca u FBiH očekuje pokretanje rada radne grupe pri Vladi Federacije BiH s ciljem pripreme sistemskih rješenja.

U toliko su konsultacije na utvrđivanju ažuriranih principa za pripremu novih propisa tema na kojoj Udruženje posljednjih mjeseci aktivno radi. Konsultacije u Mostaru ukazuju da su poslodavci u svim dijelovima FBiH opterećeni istim i sličnim pitanjima i traže hitnu promjenu stanja. Udruženje je najavilo održavanje još nekoliko skupova na ovu temu, nakon čega će principi biti potvrđeni na Upravnom odboru Udruženja poslodavca u FBiH i dostavljeni vlastima kao stav poslodavaca iz realnog sektora o predmetnom pitanju.



Sastanku je u jednom dijelu prisustvovao i premijer Vlade ZHK Predrag Čović koji se upoznao sa problemima poslodavaca u realnom sektoru i iznio svoju najavu podrške u rješavanju istih.

Sastanak fokus grupe je organizovan u sklopu projekta "Doprinos organizacija civilnog društva poboljšanju uticaja preduzetništva na socio-ekonomski razvoj BiH – EISE projekat" koji provodi UPFBiH i Unija poslodavaca RS, a koji finansira Europska unija.

## UPFBiH zastupnicima Zastupničkog doma Parlamenta FBiH: Usvojite izmjene zakona i omogućite povećanje plaće zaposlenima u realnom sektoru do 400 KM

Udruženje poslodavaca u Federaciji Bosne i Hercegovine pozdravlja jednoglasnu odluku Odbora za ekonomsku i finansijsku politiku da zatraže uvrštavanje izmjena i dopuna Zakona o doprinosima FBiH i Zakona o porezu na dohodak FBiH u dnevni red sjednice Zastupničkog doma Parlamenta FBiH zakazane za 21.06.2023.godine. Predstavници Udruženja poslodavaca u FBiH su prisustvovali sjednici Odbora i argumentirano obrazložili hitnost stavljanja na dnevni red izmjena i dopuna ova dva zakona, koje će omogućiti povećanje plaća zaposlenih u realnom sektoru do 400 KM.

"Pozivamo zastupnike Zastupničkog doma Parlamenta FBiH da prihvate uvrštavanje izmjena i dopuna Zakona o doprinosima FBiH i Zakona o porezu na dohodak FBiH na dnevni red, preuzmu odgovornost i podrže izmjene i dopune ovih zakona koje će omogućiti povećanje plata zaposlenima u realnom sektoru do 400 KM, a da se država odrekne dijela uplata za poreze i doprinose za taj uvećani iznos plate. Na taj način će najdirektnije omogućiti podršku građanima, poboljšati materijalni položaj zaposlenih u realnom sektoru i makar usporiti odlazak kvalifikovane radne snage iz BiH. Donošenjem izmjena i dopuna ovih zakona neće biti narušena stabilnost budžetskih i vanbudžetskih fondova u FBiH", naglašavaju iz UPFBiH.

Podsjećanja radi, UPFBiH je zajedno sa Savezom samostalnih sindikata BiH krajem prošle godine, nakon gotovo osam godina čekanja na usvajanje sistemskih rješenja, kreirao izmjene i dopune Zakona o doprinosima FBiH i Zakona o porezu na dohodak FBiH, čiji je cilj povećanje plaća zaposlenih u realnom sektoru, ali na način da najveći iznos pripadne radnicima, a ne kao što je do sada bio slučaj, da gotovo isti iznos povećane plate radnicima, pripadne i "državi". Također, Ekonomsko-socijalno vijeće za teritoriju FBiH jednoglasno je podržalo zajednički prijedlog UPFBiH i Saveza samostalnih sindikata u BiH.

"Sjednica Zastupničkog doma Parlamenta FBiH je posljednji momenat za donošenje izmjena i dopuna ovih zakona. U julu i augustu nam slijede godišnji odmori, nakon toga će opet neka druga pitanja biti u fokusu parlamentaraca. Već smo izgubili šest mjeseci, zastupnici i delegati Parlamenta FBiH ne smiju dozvoliti da zaposleni u realnom sektoru izgube cijelu godinu i ostanu bez značajnijeg povećanja plata", kažu u UPFBiH.



## Održan sastanak predstavnika Udruženja poslodavaca u FBiH i Udruženja poslodavaca Gračanica



Predstavnici Udruženja poslodavaca u FBiH, predsjednik i direktor Adnan Smailbegović i Mario Nenadić, održali su 15. juna 2023. godine sastanak sa predstavnicima Udruženja poslodavaca Gračanica ispred kojeg su prisustvovali predsjednik Mirsad Helić i veći broj uspješnih privrednika Gračanice. Na sastanku se razgovaralo o problemima vezanim za poslovno okruženje u Federaciji BiH, a posebno je naglašen problem odlaska radne snage što je danas, prema izjavama sudionika, ključni problem u FBiH. U tom kontekstu, naglašena je važnost rješavanja pitanja velikog opterećenja cijene rada, neophodnog smanjenja poreza i doprinosa, kao i povećanja plaća radnika i poboljšanja standarda bez novih opterećenja poslodavaca i uz hitno smanjenje doprinosa i poreza.

Učesnici sastanka govorili su o neophodnosti usklađivanja sistema obrazovanja sa potrebama tržišta rada, ali i potrebi hitnog usvajanja Zakona o posredovanju u zapošljavanju, izmjenama poreskih propisa, Zakona o bankama i dr. Sastanak je rezultirao veoma konkretnim inicijativama i preporukama te je zaključeno da će UPFBiH, skupa sa svojim članstvom, nastaviti insistirati prema vlastima da se njihove inicijative i zahtjevi u što kraćem roku razmotre kroz ekonomsko-socijalni dijalog i druge kворume i upute u proceduru prema izvršnim zakonodavnim vlastima na rješavanje.

Sastanak je organizovan u sklopu projekta "Doprinos organizacija civilnog društva poboljšanju uticaja preduzetništva na socio-ekonomski razvoj BiH – EISE projekat".

## Kompanije i radna mjesta u drvnoj industriji se moraju prilagođavati digitalizaciji i automatizaciji proizvodnje



Digitalizacija i automatizacija su sadašnjost i budućnost funkcioniranja drvne industrije i krajnje je vrijeme da se pokrenu aktivnosti na prilagođavanju kompanija i radnih mjesta ovim procesima u drvnoj industriji. Ovo je zaključeno na okruglom stolu o temi "Izazovi digitalizacije: Kako prilagoditi kompanije i radna mjesta digitalizaciji u drvnoj industriji?" kojeg su 13. juna organizirali Samostalni sindikat šumarstva, prerade drveta i papira Bosne i Hercegovine i Udruženje poslodavaca u Federaciji Bosne i Hercegovine.

Učesnicima okruglog stola predstavnici poslodavaca i sindikata iz Norveške prenijeli su iskustva kompanija iz ove države koje su prošle i još uvijek prolaze kompanije iz oblasti drvne industrije, naročito u oblasti edukacije, prekvalifikacije i dokvalifikacije radnika u skladu sa potrebama digitaliziranih i automatiziranih procesa proizvodnje. Na okruglom stolu je također zaključeno da je u oblasti šumarstva u FBiH, ali i generalno, potrebno donijeti zakonsku regulativu koja će omogućiti primjenu savremenih tehnologija u proizvodnim procesima. Istaknuto je da je potrebno donijeti strategiju razvoja šumarstva i drvne industrije u FBiH i BiH kako bi ovoj strateškoj grani industrije omogućio dalji rast i razvoj.

Kako je zaključeno, proces digitalizacije i automatizacije zahtijeva punu informiranost i uključenost radnika o izazovima koje sa sobom donosi ovaj proces. Također, neophodno je osigurati programe dokvalifikacije, prekvalifikacije i edukacije radnika, radi podizanja njihovih kompetencija, znanja vještina neophodnih za digitalizirani proces proizvodnje. To istovremeno

može biti i jedan od načina da se kvalificirana radna snaga zadrži u BiH.

Predsjednica Samostalnog sindikata šumarstva, prerade drveta i papira BiH Lejla Ćatić istaknula je da se sve više govori o digitalizaciji, automatizaciji i uvođenju novih mašina koje će zamijeniti radnike.

"To stvara određene pritiske i bojazan radnika za radna mjesta. Danas razgovaramo o tim izazovima koji zasigurno donose novi pristup, a to je promjena profila radnika, tako da ćemo imati sve više obučenih radnika, ali i potrebu prekvalifikacije i dokvalifikacije radne snage. Bitno je osigurati ostanak mladih ljudi u Bosni i Hercegovini unaprijediti njihova prava. Kolektivnim ugovorima treba urediti nove aspekte rada" naglasila je Ćatić.

Predsjednik Udruženja poslodavaca u FBiH Adnan Smailbegović naglasio je da je ključno da menadžment kompanija shvati nužnost digitalizacije.

"Digitalizacija i automatizacija su nužna potreba i naša industrija mora shvatiti da će što prije provede te procese biti konkurentnija na tržištu. Naše kompanije moramo učiniti konkurentnijim na tržištu kako bismo smanjili cijene proizvoda, a da istovremeno podižemo cijenu rada", kazao je Smailbegović.

Digitalizacija u Norveškoj, kako je rekao predsjednik Udruženja poslodavaca za drvni dizajn i tekstil Norveške Egil Sundet, ide u pozitivnom smjeru, između ostalog i zbog toga što su plate u tom sektoru izuzetno visoke, tako da samom digitalizacijom vrše i automatizaciju proizvodnje.

"Robote moramo uvesti u fabrike i mislim da su radnici u Norveškoj shvatili da bez robota fabrike nemaju budućnosti. To će u svakom slučaju unaprijediti produktivnost", kazao je Sundet.

Predstavnik za međunarodnu saradnju Sindikata industrije i energetike Norveške Ole Kristian Paulsen naglasio je da je u procesu digitalizacije ključna uključenost svih.

"Najbitniji dio procesa je učešće radnika. Radnici trebaju shvatiti da bez novih tehnologija fabrike teško opstaju na tržištu. Na primjeru fabrike u kojoj sam radio znam da niko od zaposlenih nije ostao bez posla sa uvođenjem novih tehnologija. Jednostavno, povećali smo obim proizvodnje", naglasio je Paulsen.

## Ukinut PDV na doniranu hranu u BiH



Delegati u Domu naroda Parlamenta Bosne i Hercegovine su sa 13 glasova jednoglasno usvojili Prijedlog zakona o dopuni Zakona o porezu na dodatu vrijednost kojim je ukinut PDV na doniranu hranu. Ranije je, tačnije 07. juna, Zastupnički dom Parlamentarne skupštine Bosne i Hercegovine jednoglasno usvojio dopune Zakona o porezu na dodanu vrijednost kojim se donirana hrana oslobađa plaćanja PDV-a.

Zastupnički dom je ranije jednoglasno usvojio iste izmjene, te Upravni odbor Uprave za indirektno oporezivanje dužan je da u roku od 60 dana od stupanja na snagu ovog zakona donese podzakonski akt koji će omogućiti provođenje zakona.

Zahtjev za ukidanje PDV-a na doniranu hranu je bio sadržan i u inicijativi UPFBiH za izmjenu Zakona o PDV-u koju je Udruženje poslodavaca u FBiH uputilo novom sazivu Vijeća ministara BiH.

## Rukovodstvo UPFBiH i UPKS održali sastanak sa ministrom privrede KS



Ministar privrede Kantona Sarajevo Zlatko Mijatović sastao se 02. juna 2023. godine s predstavnicima Udruženja poslodavaca u FBiH i Udruženja poslodavaca KS, te tom prilikom s njima razgovarao o unapređenju poslovnog ambijenta. U ovom smislu, razgovarano je i o podršci udruženjima poslodavaca kada su u pitanju njihova nastojanja da zajedničkim djelovanjima intenziviraju i bolje urede oblasti revidiranja i analize parafiskalnih nameta u cilju njihovog minimiziranja, analiza i reforme tržišta rada, implementacije preventivnih mjera koje imaju za cilj suzbijanja sive ekonomije putem stimulativnih mjera za legitimnu ekonomiju, te unapređenja razvoja preduzetništva.

Ministar Mijatović je istakao opredjeljenje resornog ministarstva za izmjene zakona kojima se jača privredni ambijent.

"To je svakako na listi naših prioriteta, ali je neophodna zajednička saradnja sa svim relevantnim stakeholderima u cilju temeljite i strateške analize tržišta i uslova za razvoj privrede. Očekujemo i dostavljanje konkretnih inicijativa i prijedloga od strane predstavnika privrede", istakao je ministar Mijatović.

Na sastanku je zaključeno i da je neophodno uspostaviti multidisciplinarnu radnu grupu koja će se baviti analizom parafiskalnih nameta, propisa, te prijedloga i projekata razvojnih agencija, čiji rad također treba uzeti u obzir u cilju ostvarivanja rezultata i kreiranja povoljnijeg poslovnog ambijenta.

## Jačati vezu između obrazovanja i tržišta rada



Ministrica za odgoj i obrazovanje Kantona Sarajevo Naida Hota-Muminović i ministar privrede KS Zlatko Mijatović održali su 16. juna sastanak sa Udruženjem poslodavaca Federacije Bosne i Hercegovine i Udruženjem poslodavaca KS, sa ciljem unapređenja standarda u području dualnog obrazovanja i pokretanja inicijative za ubrzanje procesa vezanih za dualno obrazovanje srednjeg i stručnog obrazovanja, te mogućnosti prekvalifikacije i dokvalifikacije kadrova. Sastanku su prisustvovali direktor Udruženja poslodavaca Federacije BiH Mario Nenadić, predsjednik Udruženja poslodavaca KS Suad Ećo, predstavnica Poslovno-edukativnog centra UPFBiH Marijana Šećibović i službenici dva resorna ministarstva.

"Važno je da poslodavci sudjeluju u procesima kreiranja upisne politike u srednjim školama u Kantonu Sarajevo. Ova konstruktivna saradnja između Vlade KS i poslodavaca predstavlja korak naprijed u jačanju veza između obrazovanja i tržišta rada, čime se osigurava bolja budućnost za mlade ljude i cjelokupno društvo u KS", istaknula je Hota-Muminović.

Na sastanku je zaključeno da se formira radno tijelo koje će koordinirati aktivnostima unapređenja srednjeg stručnog i tehničkog obrazovanja, a čiji će članovi biti predstavnici Udruženja poslodavaca Federacije BiH, Udruženja poslodavaca KS, Ministarstva privrede KS, Ministarstva za odgoj i obrazovanje KS, Ministarstva za rad, socijalnu politiku, raseljena lica i izbjeglice KS, te Službe za zapošljavanje KS.

## Obavljenje konsultacije o Nacrtu zakona o štrajku



Ministar rada i socijalne politike FBiH Adnan Delić organizovao je 02. juna sastanak na kojem je prisustvovao i direktor Udruženja poslodavaca u Federaciji Bosne i Hercegovine Mario Nenadić. Tom prilikom, predstavnici Ministarstva još jednom su se konsultovali oko pripreme teksta Nacrta zakona o štrajku, a prije njegovog daljeg upućivanja u parlamentarnu proceduru.

Isti dan u Ministarstvu su organizovane konsultacije i sa predstavnicima Sindikata nakon čega će ministar donijeti konačnu odluku i uputiti Nacrt zakona u daljnju proceduru.

## Udruženju predstavljen projekat za unapređenje sistema obrazovanja u BiH



Predsjednik Udruženja poslodavaca Kantona Sarajevo Suad Ećo i predstavnica Poslovno obrazovnog centra UPFBiH Marijana Šećibović održali su 08. juna sastanak sa višom savjetnicom za poslovni razvoj švicarske fondacija Swisscontact Anita Vasić.

Fondacija Swisscontact implementira više projekata u oblasti dualnog obrazovanja širom svijeta, a trenutno priprema projekat „Technical and Vocational Education and Training (TVET) System Strengthening in Bosnia and Herzegovina“, koji finasnira Vlada Švicarske.

Predstavnici Fondacije predstavili su ciljeve i svrhu pomenutog projekta te je razgovarano o potencijalnoj saradnji sa Udruženjem poslodavaca. Predstavnici Udruženja poslodavaca upoznali su prisutne sa problemima sa kojima se poslodavci susreću zbog neefikasnog sistema obrazovanja, odnosno neusklađenosti potreba rada sa sistemom obrazovanja, nedostatka kvalifikovane radne snage, neadekvatnih nastavnih programa u školama koji nisu orijentirani ka realnim potrebama poslodavaca i pomanjkanja kvalitetne praktične nastave. Izrazili su zainteresovanost za učestvovanje u projektu i naglasili važnost saradnje i povezanosti obrazovnih institucija i kompanija kroz ovakve i slične projekte.



## Održana sjednica Grupacije poslodavaca TK pri UPFBiH

U prostorijama Udruženja poslodavaca i samostalnih privrednika Lukavac 23. juna 2023. godine održana je sjednica Grupacije poslodavaca TK pri UPFBiH kojoj su prisustvovali predsjednik i direktor Udruženja poslodavaca u FBiH Adnan Smailbegović i Mario Nenadić. Sjednicom je predsjedavao predsjednik Upravnog odbora Grupacije Adem Hanić.

Na sjednici je raspravljano o problemima u privredi, kao i narednim aktivnostima Grupacije i Udruženja.

Predsjednik UPFBiH Adnan Smailbegović informisao je prisutne o pokrenutim aktivnostima Udruženja poslodavaca Federacije Bosne i Hercegovine koje ovo udruženje provodi na svim nivoima vlasti u BiH. Naglasio je da je akcenat stavljen na set reformskih zakona kao i na važnost i potrebu da se hitno usvoji privremeni propis koji bi omogućio poslodavcima isplatu zaposlenicima iznosa do 400,00 KM na koju bi poslodavci plaćali umanjene doprinose. Također je istakao problem s kojim se suočavaju svi poslodavci, a koji se odnosi na raspoloživost adekvatne radne snage, a zbog nepostojanja radne snage na tržištu rada, otkazuju se ugovori i nije moguće razvijati proizvodnju. S druge strane evidencije nezaposlenih nisu prikladne i daju krivu sliku. Zato je neophodno donošenje propisa koji bi omogućili rad i zapošljavanje penzionera, studenata, učenika, ali i osoba sa invaliditetom . Također je naglasio da bi se poslovne zone trebale tretirati kao infrastrukturni projekti i da se poslodavcima - investitorima omogući plaćanje zemljišta i rente npr. u pet godina što bi zasigurno potaknulo veće investiranje.

Članovi su istakli da je potrebno organizovano i udruženo djelovati kako bi se nagomilani problemi u privredi riješili te je zaključeno da se podržava rad Udruženja poslodavaca u FBiH u njihovim aktivnostima kod vlasti na hitnom rješavanju problema u vezi sa radnom snagom s kojom se poslodavci već duži vremenski period suočavaju. U cilju zaustavljanja nekontrolisanog odlaska radno sposobnog stanovništva pod hitno treba insistirati na usvajanju privremenih rješenja vezano za doprinose i dohodak, a koja će omogućiti poslodavcima isplatu do 400,00 KM radnicima uz plaćanje umanjenih doprinosa. Nadalje, potrebno je insistirati kod vlada i parlamenata na svima nivoima vlasti da pored usvajanja propisa iz oblasti doprinosa i dohotka, pristupe i hitnom usvajanju drugih reformskih zakona u cilju stvaranja povoljnijeg poslovnog okruženja, odnosno Zakona o PDV-u, Zakona o strancima, Zakona o bankama, Zakona o zdravstvenom osiguranju, Zakona o posredovanju u zapošljavanju, zakoni o dualnom obrazovanju, o radu osoba sa invaliditetom i drugi zakoni iz dokumenta "Šta poslodavci očekuju od vlasti".

## Ekonomsko-socijalno vijeće KS održat će tematske sjednice o tržištu radne snage i o stanju u zdravstvu KS



Sjednica Ekonomsko-socijalnog vijeća za područje Kantona Sarajevo, prva u novom sazivu, održana je 06. juna 2023. godine. Sjednicom je predsjedavala ministrica za rad socijalnu politiku, raseljena lica i izbjeglice KS Enda Pavić Pečenković, koja je na poziciju predsjedavajuće ESV-a KS imenovana u ime Vlade.

Novoimenovani članovi ovog tijela su i premijer KS Nihad Uk, te ministri finansija i privrede u Vladi KS Emir Dedović i Zlatko Mijatović.

Na sjednici je usvojen izvještaj o radu ESV-a KS za 2022., kao i Program rada ESV-a za tekuću godinu. Na prijedlog predstavnika poslodavaca, u Program rada uvršteno je održavanje tematskih sjednica o pitanjima tržišta radne snage, kao i o stanju u zdravstvu i položaju zdravstvenih radnika u Kantonu Sarajevo, na prijedlog predstavnika sindikata.

Ekonomsko-socijalno vijeće je nadležno za vođenje zajedničkih aktivnosti u oblasti ekonomske, socijalne i razvojne politike, afirmacije i zaštite ekonomskih i socijalnih prava i interesa zaposlenika i poslodavaca, te razvijanje sistema kolektivnog pregovaranja. Vijeće čini 12 članova, odnosno predstavnika Vlade KS, Udruženja poslodavaca, kao i Kantonalnog odbora Saveza samostalnih sindikata KS.

## Sekretar UPFBiH prisustvovala 111. konferenciji Međunarodne organizacije rada

Međunarodna organizacija rada održala je 111. godišnju Konferenciju u periodu od 5. do 16. juna 2023. u Ženevi kojoj su prisustvovali delegati sindikata, poslodavaca i vlada iz 187 država članica



ILOa. Konferenciji je i prisustvovala delegacija Bosne i Hercegovine, kao punopravne članice Međunarodne organizacije rada, a ispred Udruženja poslodavaca u FBiH prisustvovala je sekretar Mersiha Jusić.

Na Konferenciji je raspravljano o širokom rasponu pitanja, uključujući i pravednu tranziciju prema održivim i uključivim privredama, kvalitetno obrazovanje i zaštite na radu.

Delegati koji su učestvovali na 111. Međunarodnoj konferenciji rada usvojili su novu Preporuku o kvalitetnom obrazovanju. Novi radni standard ima za cilj podržati "prilike za ljude svih dobi za stalno usavršavanje, prekvalificiranje i usavršavanje" na tržištima rada koja se brzo mijenjaju. Njime se daje jasna definicija obrazovanja, specificiraju željeni standardi za kvalitetno obrazovanje, uključujući prava i zaštitu pripravnika.

Također, usvojeni su zaključci Povjerenstva za opću raspravu o pravednoj tranziciji. Delegati su podržali Smjernice ILO-a za pravednu tranziciju prema ekološki održivim privredama i društvima kao osnovu za djelovanje i središnju referencu za kreiranje politike. Tokom Konferencije registrirano je 13 ratifikacija međunarodnih konvencija o radu, uglavnom u vezi s nedavno usvojenom konvencijom protiv nasilja i uznemiravanja u svijetu rada (C190) te konvencijama koje se tiču sigurnosti i zdravlja na radu. Učesnici su raspravljali o nizu pitanja socijalne pravde, uključujući prijedlog za Globalnu koaliciju za socijalnu pravdu. Paneli na visokoj razini bavili su se nejednakostima i neformalnošću, stvaranjem jednakih mogućnosti, cjeloživotnim učenjem i razvojem vještina, socijalnom zaštitom i načinima unapređenja trgovine, održivog razvoja te ljudskih i radnih prava.

## Nova članica UPFBiH - TMD AUTOMOTIVE

TMD AUTOMOTIVE djeluje na polju mehaničkih komponenata precizne obrade, pomoću mašina s naprednom tehnologijom nude stručnost glavnim međunarodnim industrijama za izuzetno konkurentna područja kao što su automobilska industrija i industrija općenito.



Počevši od zaliha sirovina (šipki, cijevi, dijelova otkovaka, valjanih dijelova), kroz strojnu obradu kompanija pruža gotove i poluproizvode kvalitetne po najboljoj tržišnoj cijeni s najvećom pažnjom na zadovoljstvo kupaca.

Više o kompaniji pročitajte [OVDJE](#).

## Nova članica UPFBiH - KOVGRAD d.o.o.



Kompanija KOVGRAD d.o.o. je u kratkom vremenu sposobnošću, predanošću i kompetentnošću menadžmenta i svih kvalificiranih radnika stvorila rast i omogućila da se pojavi kao jedan od valjanih i kvalificiranih proizvođača čeličnih otkivaka na europskom tržištu, u primjeni u kojoj su potrebno izuzetno visoki standardi kvalitete i pouzdanosti.

Kompanija koristi razne metode kupovine i skladištenja, što omogućuje da minimalizira vrijeme isporuke. Obraduje široki promjer materijala od 50-150 mm: uglavnom ležajni čelik i drugi. Rezanje šipke vrši se automatskim mašinama za piljenje, hladnim ili vrućim rezanjem.

Kompanija teži strategiji nultog nedostatka, od pregleda sirovina do rezanja šipke, indukcijskog zagrijavanja, kovanja/valjkastog postupka, do toplinske obrade i završne obrade, te na kraju od ispitivanja i pakiranja kontrole kvalitete. Više o kompaniji pročitajte [OVDJE](#).



# UDRUŽENJE POSLODAVACA

---

**UDRUŽENJE POSLODAVACA FBiH**  
**MARŠALA TITA 6, 71 000 SARAJEVO**

**TEL: 00 387 264 830**

**FAX: 00 387 33 552 461**

**MAIL: [info@upfbih.ba](mailto:info@upfbih.ba)**

**WEB: [www.upfbih.ba](http://www.upfbih.ba)**